

## يزينب حصنچ العالي تهدم كفيلچ بالمعاره صار مغنم

وقع شايل علمنا فوق لتراب  
عميد الجيش يختي چنه انصاب  
أخافن صارت دمومه له اخصاب  
على عيني النهار بفقده اظلم

دهش قلب الوديعه وقلبه مجروح  
بجت ويّاه چنها تفغر الروح  
على العباس جر صيحاته ينوح  
يريته البين اخذني وخويه يسلم

طلع حاسر على ميمونه لحسين  
قصد للمشرعه يهل مدمع العين  
شهر سيفه او خلّه الواحد اثنين  
طفح بيه الغضب والموت حوم

تعنّى للنهر لن يسمع الصوت  
يخويه ادركني قبل يفرق الموت  
أحس لو ما تجيني يسبق الفوت  
بعد شمل الأخوه محال يلتم

هوى مثل النسر يصفق بالجناح  
على جسمه صرخ مني الأخو راح  
يعاين حالته مضمخ بالجراح  
قعد يمه على مصابه ايتهم

يفارس قلّه خلني بالله ساعه  
لخويه حسين يسأليني بوداعه  
نظر چيف ايتلوي في انزاعه  
على التربان جسمه ملطخ بدم

يقلّه حسين انا بصدري بشيلك  
للمخيّم درخّصني دخيلك  
أنا ادري اعله الحرم ذايب دليلك  
على قلبي مصابك زيّد الغم

أخذ راسه او حطّه بحجره مفزوع  
على طبراته يهمني بحرقه لدموع  
شلع قلبه او حنى بمصابه لضلوع  
يحن حنّ الفصيل بلوعة الهم

رفع راسه او ذبّه بحرّ لرمال  
يقلّه راسك ادري بعدي ينشال  
على ذروة رمح يبرى هالعيال  
بدر مخسوف نوره ويلى ما تم

يخويه حسين خلني اعله الشريعه  
أموت بُعيد عن عين الوديعة  
تشوف شلون زنديني القطيعة  
وراسي چيف تنظر له تهشم